

## **Prevenziun pertuccont animals selvadi els vitgs**

Per prevegnir als problems cullas selvaschinas en nos vitgs ed uclauns supplichescha la suprastanza communal vischinas e vischins da buca perveser las selvaschinas. Plinavon dueian composts, plontas e caglias vegnir schurmegiadas aschia, che las selvaschinas pon buca tier talas. Impurtont ei denton era ch'ils menaschis purils fan seiv (buca nezs) entuorn las ballas da silo deponidas el liber e miran da ver negin pavel entuorn stalla.

La suprastanza supplichescha da prender enconuschientscha da quellas mesiras da prevenziun ed engrazia per las breigias e la capientscha.

Suprastanza communal  
Medel/Lucmagn

## **Tagliar caglias, plontas e roma**

Tenor art. 25 dalla lescha da baghegiar astgan plontas, caglias e roma buca disturbar la vischinonza ni la segirtad publica.

Per liung dallas vias publicas e privatas, sco era sendas, ein tut las caglias, plontas e roma da tagliar anavos, aschia che nuot survarga il cunfin (era buca suenter ch'ei ha neviu).

Quellas lavurs ston esser exequidas sil pli tard entochen miez december 2017. En cass che las caglias, plontas e la roma vegnan buca tagliadas anavos enteifer il termin fixau, vegnan quellas lavurs exequidas entras la gruppa da lavur dalla vischnaunca cun adossar ils cuosts als proprietaris.

Suprastanza communal  
Medel/Lucmagn

## **Reducziun individuala dallas premias dalla cassa da malsauns (IPV) per igl onn 2017**

Persunas che han buca retschert la fin da fevrer 2017 directamein dalla Cassa da compensaziun dil cantun Grischun in formular ni in certificat cun dretg per la restituziun dallas premias dalla cassa da malsauns san – aschilunsch ch'ellas considereschan d'esser legitimadas leutier – retrer in formular d'annunzia tier l'administraziun communal.

Sin damonda da persunas cun dretg da pretensiun succeda tier midadas essenzialas dalla situaziun familiara (naschientscha, mortori, separaziun da lètg ni maridaglia) resp. economica ina nova calculaziun. Ina midada essenziala dalla situaziun economica vegn numnada sche quella munta minimum 20% dallas entradas imputablas.

Il formular d'annunzia sto vegnir inoltraus all'administraziun communal **ensemien cugl attest da segirada dalla cassa da malsauns per 2017 sil pli tard entochen la fin da december 2017.**

### **Internet – [www.sva.gr.ch](http://www.sva.gr.ch)**

Ei cunvegn da visitar la pagina d'internet dalla Cassa da compensaziun AVS. Las informaziuns las pli impurtontas, la basa legala, l'informaziun accumpignonta ed il formular da damonda ein d'anflar leu.

Administraziun commuanla  
Medel/Lucmagn

## **Orientaziun pertuccont il survetsch d'unviern 2017/2018**

### **Dustar neiv en orts e curtgins**

Cun l'arrivada digl unviern sepresentan per numerus vischins ed era per la vischnaunca divers problems caschunai entras la neiv.

Perquei eis ei indispensabel che la neiv sa vegnir dustada tscheu e leu en orts e curtgins. Nus appellein alla beincapientscha dad in e scadin da segidar e mantener ils cuosts per quei survetsch en ina rama supportabla e responsabla.

Sebasond sin la lescha cantunala da vias **sto il schischom cunfinont surprender l'aua, la neiv ed il material springiu dallas vias**. Plinavon sto il deponer la neiv agl ur dalla via vegnir toleraus senza indemnisaziun. Eventuals donns vid seivs ni auters donns giustificai vegnan surpris dil caschunader.

### **Metter sal e split**

Tenor basegns stiarna la vischnaunca sal e split. En cass urgents san ils vischins sesurvire dallas buots cun split ch'ei pustadas els differents loghens. Sch'ei vegn giavischau pustein nus ulteriuras buots. Ins sa s'annunziar tier l'administraziun communal.

### **Survetsch da pichet ils firaus, sondas e dumengias**

Ils firaus, sondas e dumengias ha la vischnaunca in survetsch da pichet. Quel vegn denton en acziun mo en situaziuns urgentas per metter neiv cul taglianeiv. Il metter sal e split ils firaus, sondas e dumengias ei buca caussa dil survetsch da pichet. Quels dis san vischinas e vischins sesurvire tenor atgna opiniun dils depots da split.

Bien engraziament per Vossa collaboraziun e capientscha.

Suprastonza commuanla  
Medel/Lucmagn

## **Atenziun cun metter grascha e puschina duront ql'unviern**

Tenor la lescha per la protecziun dallas auas eis ei scumandau da metter puschina aschigleiti che la tiara ei schelada ni cuvretga cun neiv. Il pur ei responsabels per l'observaziun da quellas prescripziuns. Specialmein ha mintga pur da prevegnir tras mesiras adattadas, ch'el vegni buca en la situaziun da stuer metter puschina duront il temps scumandau.

En cass d'urgenza, nua che la puschinera sto vegnir svidada duront temps scumandau, sto il gerau d'agricultura Giusep Flepp vegnir contactaus ordavon.

Suprastonza commuanla  
Medel/Lucmagn

## **Rimnada da cartun e fier veder**

Per segidar a sminuir il volumen da rumien dat la vischnaunca la pusseivladad da separar il cartun e fier veder (denton negins apparats electric, frestgeras e.a.v.).

Quel vegn rimnaus sil plaz dalla serenera a Curaglia e quei **mintg'auter meins la davosa gievgia**.

**26.01. / 30.03. / 18.05. / 27.07. / 28.09. / 30.11.2017**  
**mintgamai naven dallas 17.00 – 18.00 uras**

**Adatg!!** Tut il cartun sto esser mess ensemen e ligiaus ferm (**buca en scatl**as).

Suprastonza commuanla  
Medel/Lucmagn

## **Deponias communalas**

Las deponias ein aviartas naven d'immediat. Pil diever e menaschi dallas deponias ad Acla-sut ed a Fadretsch vala suandonta reglamentaziun:

### **Deponia Fadretsch**

#### **Curdem verd**

Tut il material **derivonts d'orts e curtgins** (flurs, pastg, zercllem, restonzas da caglias eav.) ei da deponer sil plaz all'entrada dalla **deponia a Fadretsch**. Gl'access per deponer material da quei gener ei garantius duront 24 uras.

#### **Adatg!!!**

**Nus supplichein instantamein da deponer sulettamein curdem verd (negin plastic, ruogs da matgs, lenna eav.), cass cuntrari ei la vischnaunca obligada egl avegnir da survegilar la deponia cun pretender ina taxa pil curdem.**

#### **Lenna /mischiera**

Per lenna veglia stat in container sigl areal dalla deponia a disposiziun. Plinavon san pigns quantums (ca. 1t) mischiera (Bauschutt) vegnir deponi en in container sisuren ella deponia. **Gronds quantums mischiera** ein da transportar directamein silla deponia regiunala a Rueun. Per lenna e mischiera vegn incassau suandontas taxas:

- lenna veglia fr. 30.—/m<sup>3</sup>
- mischiera fr. 70.—/t

**Per furniziuns da mischiera e lenna veglia eis ei da contactar ordavon il luvrer dil stradalesser e quei duront il temps da lavur (tel. 076/529 68 73).**

leli vegl da cuschinar vegn rimnaus en ina buot avon l'entrada dalla serenera. Ei secapescha da sesez che mintgin pren puspei cun el siu recipient vit.

### **Deponia Acla-sut**

Il material da scavament vegn deponius ad Acla-sut. Furniziuns da material entochen ca. 1m<sup>3</sup> ein gratuitas, per mesiras sur 1m<sup>3</sup> vegn incassau ina taxa da fr. 8.—/m<sup>3</sup>.

**La clav per la deponia sa vegnir retratga duront il temps da lavur tiel luvrer dil stradalesser ni tier l'administraziun communal.**

Suprastonza commuanla  
Medel/Lucmagn